

Mozio Arrunta, Santa Maria Orixe Ikastola Eskola Publikoko instalazioei buruzkoa

Eusko Alderdi Jeltzalea/Partido Nacionalista Vasco eta DONOSTIAKO Sozialistak/Socialistas Donostiarras udal taldeen bozeramileek, Miren Azkarate Villar eta Ernesto Gasco Gonzalo, Udalbatzaren Araudi Organikoko 98. artikulua oinarri, ondorengo MOZIO ARRUNTA aurkezten dute, Santa maria Orixe Ikastola Eskola Publikoko instalazioen eta hezkuntza egiturei buruzkoa.

JUSTIFIKAZIOA

Donostiako gobernua osatzen duten udal talde politikoez, Eusko Alderdi Jeltzalea/Partido Nacionalista Vasco eta Donostiako Sozialistak/Socialistas Donostiarrak taldeek, sinatua duten gobernu akordioaren arabera, hiriko hezkuntza-eskaintza publikoari eustea dute helburu, eta, horretarako, hezkuntza komunitatearen kezka eta eskakizunei erantzuna emango dieten politikak sustatzea.

Lan ildo honetan, udal gobernuak hainbat bilera izan ditu Parte Zaharreko Santa Maria Orixe Ikastola Ikastetxe Publikoko ordezkariekin zentroaren egoera ezagutzeko eta dituen behar nagusiak zein diren jakiteko.

Garrantzitsua da azpimarratzea Udal Gobernu honek helburu duela gainerako erakundeekin lankidetzan jardutea, hala nola Gipuzkoako Foru Diputazioarekin eta Eusko Jaurlaritzako Hezkuntza, Hizkuntza Politika eta Kultura Sailarekin, Donostiako ikastetxeen beharrak aztertu eta, guztien artean, horiei erantzuna eman eta hiritarrei kalitatezko hezkuntza-zerbitzua eskaini ahal izateko.

Santa Maria Orixe Ikastola Ikastetxe Publikoa bi eraikinetan dago banatua, bata Urgull Mendiaren magalean, eta, bestea, Aldamar kalearen eta Zuloaga Plazaren artean. Urgulleko eraikinean daude Lehen Hezkuntzako 3,4,5, eta 6 mailak, guztira 141 ikasle 2015-2016 ikasturtean. Zuloagako eraikinean, berriz, Haur Hezkuntza eta Lehen Hezkuntzako lehen zikloa (1, 2 mailak); 277 ikasle guztira. Zuloagako eraikinean dago, halaber, Donostia Zuloaga Haur Eskola.

Ikastetxe honetako instalazioak ez dira behar bezain egokiak ikasle eta irakasleen beharrei erantzuteko. Urgulleko eraikinak 80 urte ditu eta, azken urteetan hainbat obra eta egokitzapen egin arren, baditu oraindik ere urritasunak, gaurko beharretara egokitzea zailtzen dutenak. Zuloagako eraikinari dagokionez ere nabarmena da txikiegi geratu dela bertara doazen ikasleentzat.

Bestalde, azken ikasturteetan matrikulak ugaritu egin dira eta horrek larriagotu egin du lehendik zetorren arazoa. Lehen baino gela gehiago dituzte eta horrek, aldi berean, eragin zuzena du eskaintzen den zerbitzuaren kalitatean; argi ikusten da hori Gorputz Heziketan edo eskola-liburutegia izateko leku faltan.

Argi dago, beraz, Santa Maria Orixe Ikastola Ikastetxe Publikoak behar duela espazio integral bat Donostiako Parte Zaharrea, familien kalitatezko hezkuntza oso baten nahiari erantzuna emango dion zerbitzua eskaintzeko hezkuntza-komunitateari, irakasleei beren lana merezi duten duintasunez egiteko lekua eskaintzeko. Jakitun gara hezkuntza-eskumenak dituzten erakundeei dagokiela zerbitzuaren bermea, zehazki Hezkuntza, Hizkuntza

Politika eta Kultura Sailari, bai eta Donostiako Udalari ere.

Donostiako Udalak hezkuntza-ekipamenduetarako zer partzela dituen aztertu, eta Parte Zaharrean horrelako espazioak aurkitzea zein zaila den egiaztatu ondoren, uste dugu ikastetxearen beharrei erantzun integrala emateko leku egokia izan daitekeela Santa Teresa/Kalotra komentua, Urgull eraikinaren ondoan baitago; Gipuzkoako Foru Diputazioaren jabetzakoa da eta une honetan ez du inolako erabilerarik. Gaur egun baratzak dauden lekuan jolaslekuak jar daitezke eta baita orain ikastetxean lekurik ez duten hezkuntza-azpiegiturak ere. Espazio honek nabarmen hobetuko luke aipagai dugun ikastetxearen egoera eta irisgarritasun hobe ere emango lioke.

Gaia erraza ez dela jabeturik, hiru erakundeen elkarlana eskatuko duela eta egokitzapen-lanetarako finantziazioa beharko dela jakinik, hezkuntza-zerbitzu publikoari eutsi eta zerbitzu hori hobetzeko helburuak partekatzen ditugu, aukera-berdintasunean eta hezkuntza arloan ere bikaintasunean sinesten baitugu. Horregatik aurkezten dugu honako MOZIO ARRUNTA:

1. Donostiako Udalak Gipuzkoako elkarlana eskatzen dio Gipuzkoako Foru Diputazioari, Santa Teresa Komentuaren erabilera beste batzuei uzteko asmoa adierazi ondoren, Donostiako Parte Zaharreko Santa Maria Orixe Ikastetxe Publikoak dituen beharrei erantzun ahal izateko.
2. Donostiako Udalak eskatzen dio Gipuzkoako Foru Diputazioari egiaztatzeko bideragarri dela Santa Teresa komentuko Kalotra izenez ezagutzen den espazioa erabiltzea Santa Maria Orixe Ikastetxe publikoaren instalazio eta hezkuntza-zerbitzuen beharrei irtenbidea



Donostiako Udala
Ayuntamiento de San Sebastián

emateko, eta horretarako bere laguntza eskeintzen dio.

Donostia, 2016ko uztailaren 11a

Miren Azkarate Villar
EAJ/PNV

Ernesto Gasco Gonzalo
PSE-EE